


陝西通志



第四十九卷

帝系二

諸王

外戚

公主

宦官

DS
793
S4555
1735
V.49

陝西通志第四十九卷

帝系二 公主 外戚 宦官

公主

凡都秦之世帝姬皆秦產也而列傳始於唐書周隋而上缺焉今撮其事蹟顯著者以覘一代之化始云

周

武王女

大姬

鄭子產曰我先王庸以元女大姬配胡公

左傳

杜注單子曰陳我大姬之後也

國語

武王封舜後嬀滿於陳是為胡公

妻以元女大姬婦人尊貴好祭祀用史巫

漢書地理志

穆王女

叔姪

天子殯盛姬于穀邱之廟命王女叔姪為主天子東征舍于五鹿

叔姪思哭是曰女姪之邱

穆天子傳

叔姪穆王之女也

郭璞注

漢

高帝女 魯元

高祖長女魯元公主為趙王敖后史記張耳傳齊悼惠王入朝孝惠皇

帝與王讌飲行家人禮呂太后怒王懼上車太息內史參乘問其

故王具以語內史內史曰魯元公主太后之女大王之弟也大王

封國七十餘城而公主湯沐邑少大王誠獻十城為公主湯沐邑

太后必大喜是亡十城而得六十城也王曰善至邸上奏獻十城

為公主湯沐邑太后果大悅受邑厚賜而歸之新序惠帝二年冬十

月齊王來朝獻城陽郡以益魯元公主邑尊公主為太后漢書惠帝紀

文帝女 長公主

竇皇后女嫖為長公主后以建元六年崩遺詔盡以東宮金錢財

物賜長公主嫖史記外戚世家帝姑館陶公主號竇太主堂邑侯陳午尚

之午死主寡居年五十餘矣近幸董偃始偃年十三隨母出入主

家左右言其姣好主召見曰吾爲母養之至年十八而冠出則執轡入則侍內以主故諸公接之號曰董君安陵爰叔者袁盎兄子也與偃善爲畫求見上之策令主稱疾疾愈起謁上以錢千萬從主飲上臨山林主道入就坐坐未定上曰願謁主人翁主下殿徒跣頓首謝曰妾無狀負陛下陛下不致之法頓首死罪有詔謝主起之東廂自引董君前伏殿下主廼贊館陶公主胞人臣偃昧死再拜謁因叩頭謝上爲之起是時董君見尊不名稱爲主人翁飲大驩樂於是董君貴寵天下莫不聞董君至年三十而終後數歲竇太主卒與董君會葬於霸陵

漢書東方朔傳

景帝女

陽信

南宮

隆慮

王皇后長女爲平陽公主

漢書外戚傳

平陽侯曹壽尚武帝姊陽信長

公主衛青爲侯家驕從平陽主建元二年青姊子夫得入宮幸上

元朔元年以有男立爲皇后封青爲長平侯五年拜大將軍青既貴而平陽侯壽有惡疾就國長公主問列侯誰賢者左右皆言大將軍主笑曰此出吾家常騎從我奈何左右曰於今尊貴無比於是長公主風白皇后皇后言之上廼詔青尚平陽主衛青傳如淳曰

本陽信長公主也爲平陽侯所尚故稱平陽主

衛青傳注。按漢書夏侯嬰傳嬰曾

孫頗尚平陽公主主隨外家姓號孫公主是漢有兩平陽主而此則主之虛號彼則主之實封也因未載爲何帝之女附誌於此

王皇后女次南宮公主次隆慮公主

漢書外戚傳

隆慮公主子昭平君

尚帝女夷安公主隆慮主病以金千斤錢千萬爲昭平君豫贖死

罪上許之隆慮主卒昭平君日驕醉殺主傳獄繫內官以公主子

廷尉上請請論左右人人爲言前又入贖陛下許之上曰吾弟老

有是一子死以屬我於是爲之垂涕歎息良久曰法令者先帝所

造也用弟故而誣先帝之法何面目入高廟乎乃可其奏

東方朔傳

武帝女當利 鄂邑

天子見樂大大悅拜為五利將軍封樂通侯以衛長公主妻之更

命其邑曰當利公主史記封禪書索隱曰衛長公主是衛后長女也非

如帝姊曰長公主之例封禪書注

後元二年二月立昭帝為太子太子即皇帝位姊鄂邑公主益湯

沐邑為長公主共養省中元鳳元年長公主共養勞苦復以藍田

益長公主湯沐邑漢書昭帝紀昭帝始立年八歲帝長姊鄂邑蓋長公

主居禁中共養帝蓋主私近子客河間丁外人上聞之不絕主驩

有詔外人侍長主外戚傳上官桀因帝姊鄂邑蓋主內安女後宮為

皇后桀父子德長公主主近幸河間丁外人桀安欲為外人求封

幸依國家故事以列侯尚公主者光不許又為外人求光祿大夫

欲令得召見又不許長主大以是怨光桀等乃謀令長公主置酒

請光伏兵格殺之事發蓋主自殺霍光傳

宣帝女館陶敬武

于定國子永以列侯爲御史大夫尚館陶公主施施者宣帝長女

成帝姑也賢有行永以選尚焉漢書于定國傳

薛宣爲丞相封高陽侯子況以事徙敦煌初宣爲侯時敬武長公

主寡居上令宣尚焉及宣免歸故郡公主留京師宣卒主上書願

還宣葬延陵奏可况私從敦煌歸長安會赦因留與主私亂元始

中莽自尊爲安漢公主又出言非莽莽治况發其罪使使者以太

皇太后詔賜主藥主遂飲藥死白太后云主暴病薨太后欲臨其

喪莽固爭乃止漢書薛宣傳

高祖女蘭陵

蘭陵公主字阿五高祖第五女也性婉順好讀書高祖於諸女中特所鍾愛適河東柳述諸姊並驕倨主獨折節遵婦道事舅姑甚謹高祖大悅由是述漸見寵遇初晉王廣欲以主配其妃弟蕭瑒後適述晉王不悅及述用事彌惡之高祖崩述徙嶺表煬帝將改嫁之主以死自誓表請免主號與述同徙帝不從主憂憤而卒時年三十二臨終上表曰昔共姜自誓著美前詩卽媼不言傳芳往詰妾雖負罪竊慕古人生既不得從夫死乞葬於柳氏帝覽之愈怒葬主於洪瀆川資送甚薄朝野傷之

隋書列女傳

煬帝女

南陽

南陽公主煬帝長女也美風儀有志節年十四嫁于許國公宇文述子士及以謹肅聞及宇文文化及弒逆主隨至聊城化及爲竇建德所敗士及自濟北歸唐時隋代衣冠並在建德引見之莫不惶

懼失常惟主神色自若自陳國破家亡不能報怨雪恥淚下盈襟
聲辭不輟情理切至觀聽者咸肅然敬異焉尋請爲尼及建德敗
將歸西京復與士及遇於東都主不與見士及請復爲夫妻主拒
之曰我與君讎家今恨不能手刃君者但謀逆之日察君不預知
耳因呵令速去士及固請之主怒曰必欲就死可相見也士及知
不可屈乃拜辭而去

隋書列女傳

唐

高祖女

平陽

高密

長廣

丹陽

安定

常樂

平陽昭公主太穆皇后所生下嫁柴紹初高祖兵興主居長安紹
曰尊公將以兵清京師我欲往恐不能偕奈何主曰公行矣我自
爲計紹詭道走并州主奔鄜發家貲招南山亡命得數百人以應
帝賊何潘仁壁司竹園殺行人稱總管主遣家奴馬三寶喻降之

共攻鄜別部賊李仲文向善志邱師利等各持所領會戲下因畧地蓋屋武功始平下之乃申法誓衆禁剽奪遠近咸附勒兵七萬威震關中帝渡河紹以數百騎並南山來迎主引精兵萬人與秦

王會渭北紹及主對置幕府分定京師號娘子軍武德六年薨

唐書

本傳公主高祖第三女也京城平封平陽公主六年薨將塋詔加前

後部羽葆鼓吹大輅麾幢班劍四十人虎賁甲卒太常奏議以禮

婦人無鼓吹高祖曰鼓吹軍樂也往者公主舉兵以應義旗親執

金鼓有克定之勲周之文母列於十亂公主功叅佐命非常婦人

所匹遂特加之以旌殊績仍令所司按謚法明德有功曰昭謚公

主爲昭

舊唐書
柴紹傳

高密公主下嫁長孫孝政又嫁段綸永徽六年薨遺命吾葬必令

墓東向以望獻陵冀不忘孝也

唐書
本傳

長廣公主始封桂陽下嫁趙慈景爲華州刺史討堯君素戰死更

嫁楊師道聰悟有思工爲詩豪侈自肆晚稍折節以壽薨

唐書本傳

丹陽公主下嫁薛萬徹萬徹愆甚公主羞不與同席者數月太宗

聞笑焉爲置酒悉召他壻與萬徹從容語握槊賭所佩刀陽不勝

遂解賜之主喜命同載以歸

唐書本傳

安定公主始封千金下嫁溫挺挺死又嫁鄭敬元

唐書本傳

則天將革

命誅殺宗屬諸主惟千金公主以巧媚善進奉獨存抗疏請以則

天爲母因得曲加恩寵改邑號爲延安大長公主加實封賜姓武

氏以子克乂娶魏王武承嗣女內門參問不限早晚見則盡歡

舊唐書

書薛懷義傳

常樂長公主壽州刺史趙瓌妻高祖第七女和思皇后之母也

舊唐書

諸子傳趙瓌徙壽州越王貞將舉兵遺瓌書假道瓌將應之主進

使者曰爲我謝王與其進不與其退若諸王皆丈夫不應淹久至是我聞楊氏篡周尉遲迥乃周出猶能連突厥使天下嚮震況諸王國懿親宗社所託不捨生取義尚何須耶人臣同國患爲忠不同爲逆王等勉之王敗周與劾瓌與主連謀皆被殺

唐書本傳

太宗女

襄城 南平 長樂 北景 東陽 臨川 城陽 合浦 晉陽 新城

襄城公主下嫁蕭銳性孝睦動循矩法帝勅諸公主視爲師式有

司告營別第辭曰婦事舅姑如父母異宮則定省闕止葺故第門列雙戟而已銳卒更嫁姜簡永徽二年薨高宗舉哀於命婦朝堂

遣工部侍郎邱行淹馳驛弔祭陪葬昭陵

唐書本傳

南平公主下嫁王敬直以累斥嶺南更嫁劉元意

唐書本傳

王珪子敬

直尚南平公主禮有婦見舅姑之儀近代公主出降此禮皆廢珪曰今主上欽明動循法制吾受公主謁見豈爲身榮所以成國家

之美耳遂與其妻就席而坐令公主親執筭行盥饋之道禮成而

退是後公主下降有舅姑者皆備婦禮自珪始

舊唐書
王珪傳

長樂公主下嫁長孫冲

唐書
本傳

文德皇后所生長樂公主太宗特所

鍾愛將出降勅所司資送倍於長公主魏徵諫曰謂長主者良以

尊於公主也若令公主之禮有過長主理恐不可太宗退而告后

后歎曰嘗聞陛下重魏徵今聞其諫乃能以義制主之情可謂正

直社稷之臣矣願陛下詳之因請遣中使齎帛五百疋詣徵宅賜

之

舊唐書
后妃傳

北景公主始封巴陵下嫁柴令武坐與房遺愛謀反同主賜死顯

慶中追贈立廟於墓四時祭以少牢

唐書
本傳

東陽公主下嫁高履行高宗卽位進爲大長公主帝正矩之誅主

坐婚家斥徙集州又坐章懷太子累奪邑封以長孫無忌舅族故

武后惡之垂拱中並二子徙置巫州

唐書本傳

臨川公主韋貴妃所生下嫁周道務主工籀隸能屬文高宗立上

孝德頌帝下詔褒答永徽初進長公主恩賞卓異永淳初薨

唐書本傳

城陽公主下嫁杜荷坐事誅又嫁薛瓘初主之婚帝使卜之繇曰

二火皆食始同榮末同戚請晝婚則吉馬周諫曰朝謁以朝思相

戒也講席以晝思相成也燕飲以晷思相歡也婚合以夜思相親

也故上下有成内外有親動息有時吉凶有儀今先亂其始不可

爲也夫卜所以決疑若黷禮慢先聖人所不用帝乃止麟德初瓘

歷左奉宸衛將軍主坐巫蠱斥瓘房州刺史主從之官咸亨中主

薨而瓘卒雙柩還京師

唐書本傳

合浦公主始封高陽下嫁房元齡子遺愛主帝所愛故禮異他壻

主負所愛而驕元齡卒主導遺愛異貲旣而反譖之帝痛讓主乃

免自是稍疏外主怏怏會御史劾盜得浮屠辨機金寶神枕自言主所賜初浮屠廬主之封地會主與遺愛獵見而悅之具帳其廬與之亂更以二女子從遺愛私餉億計至是浮屠殊死殺奴婢十餘主益望帝崩無哀容又浮屠智勗迎占禍福惠弘能視鬼道士李晃高醫皆私侍主主使掖庭令陳元運伺宮省機祥步星次永徽中與遺愛謀反賜死顯慶時追贈

唐書本傳

晉陽公主字明達幼字兕子文德皇后所生未嘗見喜慍色帝有所怒責必伺顏徐徐辨解故省中多蒙其惠后崩時主始孩及五歲經后所游地哀不自勝帝諸子惟晉王及主最少故親畜之王每出閣主送至虔化門泣而別王勝衣班於朝主泣曰兄今與群臣同列不得在內乎帝亦爲流涕主臨帝飛白書下不能辨薨年十二帝閱三旬不常膳日數十哀因以癰羸群臣進勉帝曰朕知

悲哀無益而不能已亦不知其所以然因詔有司簿主湯沐餘資

營佛祠墓側

唐書本傳

新城公主晉陽母弟也下嫁長孫詮詮以罪徙嶺州更嫁韋正矩

正矩遇主不以禮俄而主暴薨高宗詔三司雜治正矩不能辨伏

誅以皇后禮葬昭陵旁

唐書本傳

高宗女

義陽

高安

太平

義陽公主蕭淑妃所生下嫁權毅

唐書本傳

義陽宣城二公主以母得

罪幽於掖庭垂三十年不嫁孝敬見之驚憫遽奏出降則天大怒

卽日以衛士二人配二公主

大唐新語

高安公主義陽母弟也始封宣城下嫁潁州刺史王勗天授中勗

爲武后所誅神龍初進冊長公主開府置官屬薨開元時元宗哭

於暉政門遣大鴻臚持節赴弔京兆尹攝鴻臚護喪事

唐書本傳

公主

頃歲奉嘗觀高宗畫像感咽於地遂成心疾而終

蘇頌撰高安公主碑

太平公主則天皇后所生后愛之傾諸女擇薛紹尚之紹死更嫁

武承嗣會承嗣小疾罷婚后殺武攸暨妻以配主主方額廣頤多

陰謀后嘗謂類我而主內與謀外檢畏終后世無他訾預誅二張

功增號鎮國與相王衛王成王長寧安樂二公主給衛士環第持

兵呵衛僭肖宮省神龍時與長寧安樂宜城新都定安金城凡七

公主皆開府置官屬視親王主三子崇簡崇敏崇行皆拜三品韋

后上官昭容用事自以謀出主下憚之主亦自以軋而可勝故益

橫元宗將誅韋氏主與秘計將立相王未有以發其端主顧溫王

可劫以爲功乃入見王曰天下事歸相王此非兒所坐乃掖王下

取乘輿服進睿宗睿宗卽位主權震天下加實封至萬戶三子封

王餘皆祭酒九卿主每奏事漏數徙乃得退所言皆從有所論薦

或躡進至侍從旋踵將相朝廷大政事非關決不下不朝則宰相就第咨判天子畫可而已主侍武后久善策人主微指先事逢合無不中元宗以太子監國使宋王岐王總禁兵主恚乘輦至光範門召宰相白廢太子於是宋璟姚元之請出主東都帝不許詔主居蒲州居四月太子表追還京師時宰相七人五出主門下又左羽林大將軍常元楷知羽林軍李慈皆私謁主主內忌太子乃有逆謀先天二年與尚書左僕射竇懷貞侍中岑羲中書令蕭至忠崔湜等謀廢太子使元楷慈舉羽林兵入武德殿殺太子懷貞羲至忠舉兵南衙爲應太子得其姦前一日梟元楷慈於北闕下執羲至忠至朝堂斬之主聞變亡入南山三日不出賜死於第諸子及黨與死者數十人崇簡素知主謀苦諫主怒榜掠尤楚至是復

官爵賜氏李

唐書本傳

中宗女

宜城

定安

長寧

永泰

安樂

成安

宜城公主始封義安郡主下嫁裴吳吳有嬖姝主恚斷吳髮帝怒斥爲縣主吳左遷久之復故封神龍元年與長寧新寧義安安樂

新平五郡主皆進封

唐書本傳

定安公主始封新寧郡下嫁王同皎同皎得罪神龍時又嫁韋濯

濯卽韋皇后從祖弟以衛尉少卿誅更嫁太府卿崔銑主薨王同

皎子請與父合葬給事中夏侯銍曰主義絕王廟恩成崔室逝者

有知同皎將拒諸泉銍或訴於帝乃止銍坐是貶

唐書本傳

長寧公主韋庶人所生下嫁楊沓交造第東都又取西京高士廉

第左金吾衛故營合爲宅右屬都城左瀕大道作三重樓以憑觀

築山浚池帝及后數臨幸置酒賦詩東都廢永昌縣主勾其治爲

府以地瀕洛築障之崇臺蜚觀相聯屬無慮費二十萬魏王泰故

第東西盡一坊瀦沼三百畝泰薨以與民至是主苟得之亭閣華

詭埒西京內倚母愛寵傾一朝與安樂宣城二主后媚鄙國崇國

夫人爭任事賊謁紛紜東都第成不及居韋氏敗斥脊交絳州別

駕主偕往開元十六年脊交死主更嫁蘇彥伯

唐書本傳

永泰公主以郡主下嫁武延基大足中忤張易之爲武后所殺帝

追贈以禮改葬號墓爲陵

唐書本傳

安樂公主帝遷房陵而生解衣以祿之名曰褰兒姝秀辨敏后尤

愛之下嫁武崇訓帝復位光艷動天下侯王柄臣多出其門嘗作

詔箝其前請帝署可帝笑從之又請爲皇太女與太平等七公主

皆開府而主府官屬尤濫皆出屠販納訾售官降墨勅斜封授之

故號斜封官主營第及安樂佛廬皆憲寫宮省而工緻過之嘗請

昆明池爲私沼帝曰先帝未有以與人者主不悅自鑿定昆池延

表數里司農卿趙履溫爲繕治累石肖華山陞約橫邪回淵九折以石漢水又爲寶鑪鏤怪獸神禽間以瑱貝珊瑚不可涯計崇訓死主素與武延秀亂卽嫁之是日假后車輅自宮送至第帝與后御安福門臨觀翼日大會群臣太極殿主被翠服出嚮天子再拜南面拜公卿公卿皆伏地稽首帝御承天門大赦因賜民酺三日奪臨川長公主宅以爲第旁撤民廬怨聲囂然第成禁藏空殫假萬騎仗內音樂送主還第崇訓子方數歲拜太常卿封鎬國公實封戶五百時主與長寧定安三家廝臺掠民子女爲奴婢左臺侍御史袁從一縛送獄主入訴帝手詔喻免臨淄王誅庶人主方覽鏡作眉聞亂走至右延明門兵及斬其首追貶爲悖逆庶人睿宗

卽位詔以二品禮葬之

唐書本傳

成安公主字季姜始封新平下嫁韋捷捷以韋后從子誅主後

唐書
本傳

睿宗女

涼國

鄭國

金仙

玉真

涼國公主字華莊始封仙源

唐書本傳

公主與多於仙源稱長於涼國

故丞相太原溫彥博曾孫曦僉諧是圖歷選伊尚開元十二載八

月遇疾薨於京邸永嘉里第上徹懸久悼臨次增涕京尹護喪群

司藏事其年仲冬陪葬於橋陵

蘇頌撰涼國長公主碑

鄭國公主始封荆山下嫁薛儼又嫁鄭孝義

唐書本傳

鄭國長公主者

睿宗之第七女也母曰崔貴妃免懷之歲天奪聖善不食三日哀

比成人及乎玉笄耀首油駟在馭錫之美地邑以荆山求之令族

嬪於薛氏開元繼明恩由已進封鄭國長公主食邑一千二百戶

其後君子晨歌夫人晝哭未亡為稱生意盡矣朝制斷恩改降鄭

氏均養七子麻廕二宗汾陰之室忘亡榮陽之黨相慶開元十三

年二月薨春秋三十有七有詔光祿卿孟溫禮監護喪葬京兆尹

熊延休副焉窆之禮一如涼國長公主故事

張說撰郎國長公主碑

金仙公主始封西城縣主景雲初進封太極元年與玉真公主皆

爲道士築觀京師以方士史崇元爲師

唐書本傳

玉真公主字持盈始封崇昌縣主俄進號上清元都大洞三景師

天寶三載上言曰先帝許妾捨家今仍叨主第食租賦誠願去公

主號罷邑司歸之王府元宗不許又言妾高宗之孫睿宗之女陛

下之女弟於天下不爲賤何必名繫主號資湯沐然後爲貴請入

數百家之產延十年之命帝知主意乃許之薨寶應時

唐書本傳

上皇

自蜀還京居興慶宮肅宗自夾城中起居上皇時召伶官奏樂持

盈公王往來宮中李輔國常陰候其隙而間之上元元年上皇嘗

登長慶樓與公主語劔南奏事官過朝謁上皇令公主及如仙媛

作主人輔國因持盈待客乃奏云南內有異謀矯詔移上皇居西

內送持盈於玉真觀

舊唐書
宦者傳

元宗女

萬安

晉國

新昌

楚國

廣寧

太華

新平

壽安

萬安公主天寶時爲道士開元新制長公主封戶二千帝妹戶千
率以三丁爲限皇子王戶二千主半之左右以爲薄帝曰百姓租
賦非我有士出萬死賞不過束帛女何功而享多戶耶使知儉嗇
不亦可乎於是公主所稟不給車服後咸宜以母愛益封至千戶
諸主皆增自是著于令主不下嫁亦封千戶有司給奴婢如令

唐書

本傳

晉國公主始封高都下嫁崔惠童貞元元年與衛楚宋齊宿蕭鄧

紀邨國九公主同徙封

唐書
本傳

新昌公主下嫁蕭衡

唐書
本傳

蕭嵩之子衡尚新昌公主嵩夫人賀氏

入觀拜席元宗呼爲親家母禮儀甚盛

舊唐書
蕭嵩傳

楚國公主始封壽春下嫁吳澄江上皇居西宮獨主得入侍興元

元年請爲道士詔可賜名上善

唐書
本傳

廣寧公主董芳儀所生下嫁程昌裔又嫁蘇克貞薨大曆時

唐書
本傳

天寶十載正月望夜楊家五宅夜遊與廣寧公主騎從爭西市門

楊氏奴揮鞭及公主衣公主墮馬駙馬程昌裔扶公主因及數過

公主泣奏之上令殺楊氏奴昌裔亦停官

舊唐書
后妃傳

太華公主貞順皇后所生下嫁楊錡薨天寶時

唐書
本傳

貴妃再從兄

錡侍御史尚武惠妃女太華公主以母愛禮遇過於諸公主賜甲

第連於宮禁

舊唐書
后妃傳

新平公主常才人所生幼智敏習知圖訓帝賢之下嫁裴玢又嫁

姜慶初慶初得罪主幽禁中薨大曆時

唐書
本傳

壽安公主下嫁蘇發

唐書本傳

元宗禁中嘗稱阿瞞亦稱鴉壽安公主

曹野那姬所生以九月誕遂不出降常令衣道服主香火小字蟲

娘上呼爲師娘爲太上皇時代宗起居上曰汝在東宮甚有令名

因指壽安蟲娘爲鴉女汝後與一名號及代宗在靈武遂令蘇澄

尚之封壽安

西陽雜俎○按文宗開成二年以壽安公主降成德節度使王元逵乃絳王悟女非帝主也不錄又按蘇

發雜俎作蘇澄疑有誤

肅宗女

蕭國

和政

部國

蕭國公主始封寧國下嫁鄭異又嫁薛康衡乾元元年降回紇英

武威遠可汗乃置府二年還朝貞元中讓府屬更置邑司

唐書本傳乾

元元年秋七月丁亥詔寧國公主出降甲午肅宗送公主至咸陽

礪門驛公主泣而言曰國家事重死且無恨上流涕而還及至昆

伽闕可汗冊公主爲可敦蕃酋歡欣曰唐天子貴重將真女來二

年夏四月可汗死其牙官都督等欲以公主殉葬公主曰我中國法壻死卽持喪朝夕哭臨三年行服今回紇娶婦須慕中國禮若依本國法何須萬里結婚然公主亦依回紇法務面大哭竟以無

子得歸

舊唐書回紇傳

和政公主章敬太后所生生三歲后崩養於韋妃性敏惠事妃有孝稱下嫁柳潭安祿山陷京師寧國公主方薨居主棄三子奪潭馬以載寧國身與潭步日百里潭躬水薪主躬爨以奉寧國初潭兄澄之妻楊貴妃娣也勢幸傾朝公主未嘗干以私及死撫其子如所生從元宗至蜀郭千仞反元宗御元英樓諭降之不聽潭率折衝張義童等殊死鬪主彀弓授潭潭手斬賊五十級平之肅宗有疾主左右勤勞詔賜田以女弟寶章主未有賜固讓不敢當主布思之妻隸掖庭帝宴使衣綠衣爲倡主諫曰布思誠逆人妻不

容近至尊無罪不可與群倡處帝爲免出之自兵興財耗主以貿
易取奇贏千萬贍軍及帝山陵又進邑入千萬代宗初立屢陳人
間利病國家盛衰事廣德時吐蕃再入寇主方姪入語備邊計潭
固止主曰君獨無兄乎入見內殿翼日免乳而薨

唐書本傳

郜國公主始封延光下嫁裴徽又嫁蕭升升卒主與彭州司馬李
萬亂蜀州別駕蕭鼎澧陽令韋憚太子詹事李昇皆私侍主家久
之姦聞德宗怒幽主他第杖殺萬斥鼎憚昇嶺表貞元四年又以
厭蠱廢六年薨子位坐以蠱祝囚端州佩儒僊囚房州前生子駙
馬都尉裴液囚錦州主女爲皇太子妃帝畏妃怨望將殺之未發
會主薨太子屬疾乃殺妃以厭災謚曰惠

唐書本傳

代宗女

齊國

華陽

嘉豐

長林

趙國

新都

齊國昭懿公主崔貴妃所生始封升平下嫁郭曖大曆末寰內民

訴涇水爲磴壅不得溉田京兆尹黎幹以請詔撤磴時主及曖家皆丐留帝曰吾爲蒼生若可爲諸戚倡卽日毀由是廢者八十所

堯元和時贈號國賜謚穆宗立復贈封

唐書本傳

李端工詩大曆中與

錢起等文詠唱和號大曆十才子時郭曖尚昇平公主賢明有才

思尤喜詩人而端等多在曖門下每宴集賦詩公主坐視簾中詩

美者賞百縑曖因拜官會十子曰詩先成者賞時端先獻警句云

薰香荀令偏憐小傳粉何郎不解愁主卽以百縑賞之錢起曰李

校書誠有才此篇宿構也願賦一韻正之請以起姓爲韻端卽襞

牋而獻曰新開金埒教調馬舊賜銅山許鑄錢曖曰此愈工也起

等始服

舊唐書李

曖嘗與公主琴瑟不調曖罵公主倚乃父爲天

子我父嫌天子不作公主恚奔車奏之上曰他父實嫌天子不作

否則社稷豈汝家有也因泣下但命公主還尚父拘曖自詣朝堂

待罪上召而慰之曰不痴不聾不作阿家翁小兒女閨幃之言安用聽錫賚以遣之尚父杖屨數十

因諸錄

華陽公主韶悟過人帝愛之視帝所喜必善遇所惡曲全之大曆

七年以病丐爲道士號瓊華真人病甚帝指傷薨追封

唐書本傳獨

孤貴妃生華陽公主公主薨上嗟悼數日不視朝宰臣等因中使

吳承倩附奏言修短常理以社稷之重宜節哀視事上始聽朝大

曆十年五月貴妃薨追謚曰貞懿皇后命宰臣常袞爲哀冊文旨

悽悼覽者惻然公主先葬於城東地卑濕至是徙葬祔於莊陵之

園故哀詞云招帝子於北渚從母后於東陵

舊唐書后妃傳

嘉豐公主下嫁高怡與普寧公主同降有司具冊禮光順門以雨

不克罷薨建中時

唐書本傳

長林公主下嫁衛尉少卿沈明貞元二年具冊禮德宗不御正殿

不設樂遂爲故事薨元和時

唐書本傳

趙國莊懿公主始封武清貞元元年徙封嘉誠下嫁魏博節度使

田緒德宗幸望春亭臨餞厭翟敕不可乘以金根代之公主出降

乘金根車自主始薨元和時贈封及謚

唐書本傳

緒子季安母微賤公

主畜爲已子故寵異諸兄年數歲充魏博節度副大使緒卒時季

安年纔十五軍人推爲留後朝廷因授魏博節度營田觀察處置

等使季安幼守父業懼嘉誠之嚴粗修禮法及公主薨遂自恣

舊唐

書田承

嗣傳

新都公主貞元十二年下嫁田華具禮光順門五禮由是廢

唐書本傳

德宗女

韓國

魏國

鄭國

燕國

韓國貞穆公主幼謹孝帝愛之始封唐安將下嫁秘書少監韋育

而朱泚亂從至城固薨加封謚

唐書

公主上之長女昭惠皇后所

生聰敏仁孝上所鍾愛及薨上悲悼尤甚詔所司厚其塋禮姜公
輔諫曰克復京城公主必須歸葬今於行路且宜儉薄以濟軍士
德宗怒謂陸贄曰唐安天亡不欲於此爲塋壠令造一磚塔安置
功費甚微不合關宰相論列贄對曰宰相論事但問理之是非豈
論事之大小若造塔爲是役雖大而作之何傷若造塔爲非費雖
小而言者何罪帝怒不已乃罷公輔爲左庶子

舊唐書姜公輔傳

魏國憲穆公主始封義陽下嫁王士平主恣橫不法帝幽之禁中
錮士平於第久之門下客蔡南史獨孤申叔爲主作團雪散雪辭
狀離曠意帝怒捕南史等逐之幾廢進士科薨追封及謚

唐書本傳

鄭國莊穆公主始封義章下嫁張孝忠子茂宗薨加贈及謚

唐書本傳

張孝忠爲義武軍節度朝廷以其子茂宗尚義章公主孝忠遣其
妻鄧國夫人入朝執親迎之禮以公主幼待年十三會茂宗母亡

遺表請終嘉禮卽日起復授左衛將軍同正駙馬都尉諫官蔣乂等請待終制然後賜婚德宗不納竟以義章公主降茂宗

舊唐書張孝忠

傳

燕國襄穆公主始封咸安下降回紇武義成功可汗置府薨元和

時追封及謚

唐書本傳

回紇使使者請和親詔咸安公主下嫁又詔使

者合闕達干見公主於麟德殿使中謁者齎公主畫圖賜可汗明

年可汗遣其妹逆主且納聘上書恭甚帝盡建延安公主官屬視

王府以嗣滕王湛然爲昏禮使右僕射關播護送冊拜公主爲智

慧端正長壽孝順可敦

回紇傳

順宗女

漢陽

襄陽

海陽

漢陽公主莊獻皇后所生始封德陽郡主下嫁郭鏌辭歸第泣不

自勝德宗曰兒有不足耶對曰思相離無他恨也帝亦泣永貞元

年與諸公主皆進封戚近爭爲奢詡主獨以儉常用鐵簪畫壁記田租所入文宗尤惡流侈因主入問曰姑所服何年法也今之弊何代而然對曰妾自貞元時辭宮所服皆當時賜未嘗敢變元和後數用兵悉出禁藏纖麗物賞戰士由是散於人間內外相矜狃以成風若陛下示所好於下誰敢不變帝悅詔宮人視主衣製廣狹徧諭諸主且勅京兆尹禁切浮靡主嘗誨諸女曰先姑有言吾與若皆帝子驕盈貴侈可戒不可恃開成五年薨

唐書本傳

襄陽公主始封晉康縣主下嫁張克禮

唐書本傳

李元本生於貴族輕

薄無行初襄陽公主縱恣不法常遊行市里有士族子薛樞薛渾者俱得幸於主尤愛渾每詣渾家謁渾母行事姑之禮渾與元本遂相誘掖亦得幸於主出入主第克禮不勝其忿上表陳聞乃召主幽於禁中以元本功臣之後得減死杖六十流象州樞渾亦從

輕杖八十長流崖州

舊唐書李寶臣傳

潯陽公主崔昭儀所生太和三年與平恩邵陽二公主並爲道士

歲賜封物七百匹

唐書本傳

憲宗女

梁國

岐陽

臨真

真源

安平

永安

太和

梁國惠康公主始封普寧帝特愛之下嫁于季友元和中徙永昌

薨詔追封及謚將葬度支奏義陽義章公主葬用錢四千萬有詔

減千萬

唐書本傳

岐陽莊淑公主懿安皇后所生下嫁杜悰帝爲御正殿臨遣由西

朝堂出復衙延喜門止主車大賜賓從金錢開第昌化里疏龍首

池爲沼后家上尚父大通里亭爲主別館貴震當世然主事舅姑

以禮聞所賜奴婢偃蹇皆上還丐直自市悰爲澧州刺史主與偕

從婢乘驢不肉食州縣供具不受姑寢疾藥糜不嘗不進開成中

悰自忠武入朝主疾侵曰願朝興慶宮雖死於道不恨道薨

唐書本傳

杜司空悰自忠武軍節度使出澧陽宏詞李宣古者數陪遊讌戲謔侮慢杜不能容使卧於泥中欲辱之櫬楚公主聞之不待穿履奔救之曰尚書在飲筵而舉人細過待士如此那得平陽之譽乎遂遣人扶起李秀才於東院沐浴更衣却赴中座公主傳旨京兆公請爲詩冀彌縫也後二子裔休儒休皆以進士登科人謂非其母賢不成其子

雲溪友議

臨眞公主始封襄城下嫁衛洙薨咸通時

唐書本傳

眞源公主始封安陵下嫁杜中立

唐書本傳

初文宗欲以眞源臨眞二

公主降士族謂宰相曰民間婚姻不計官品而上閥閱我家二百年天子顧不及崔盧耶詔宗正卿取世家子以聞中立及校書郎衛洙得名見禁中尚主

杜兼傳

安平公主下嫁劉異薨乾符時

唐書本傳

上親妹安平公主下嫁駙馬

都尉劉異上命宰臣與一方面中書擬平盧節度使上謂曰朕只

有一妹時欲見之平盧去京復遠卿別思之宰臣乃奏邠寧節制

近於平盧仍許公主歲時乘傳入京異將赴鎮安平入辭以異姬

人從安平左右皆宮人上盡記之忽見別姬問安平曰此誰也安

平曰劉郎聲音人上悅安平不如喜形於色顧左右便不令與宮

娃同處上之甄別防閑纖微不遺如此

東觀奏記

永安公主長慶初許嫁回鶻保義可汗會可汗死止不行太和中

丐爲道士詔賜邑印如潯陽公主故事且歸婚賞

唐書本傳

元和八年回紇請和親久未之許穆宗卽位乃封第十妹爲太和

公主出降回紇穆宗御通化門臨送儀衛甚盛長慶二年閏十月

金吾衛大將軍胡鉦等送公主至自回紇開成初黠戛斯破回紇

得公主令達干等送至塞上烏介途遇達干等被殺公主却歸烏

介可汗乃質公主同行南渡大磧至天德界奏請天德城與公主

居

舊唐書
回紇傳

石雄隸振武劉沔軍爲裨將會昌初回鶻寇天德詔命

沔爲招撫回鶻使沔謂雄曰黠虜離散不足驅除國家以公主之

故不欲急攻我輩捍邊但能除患專之可也公可選驍健乘其不

意徑趨虜帳彼以疾雷之勢不暇枝梧必棄公主亡竄事苟不捷

吾自繼進亦無患也雄自選勁騎夜發馬邑徑趨烏介之牙時虜

帳逼振武雄入城見羶車數十從者皆衣朱碧類華人令謀者訊

之曰此公主帳也雄喻其人曰國家兵馬欲取公主至此乃夜穴

城爲十餘門遲明城上立旗張炬火於諸門縱牛畜鼓譟從之直

犯烏介牙帳可汗惶駭莫測率騎而奔遂迎公主還太原

石雄傳

定

安公主始封太和下嫁回鶻崇德可汗會昌三年來歸主次太原

詔使勞問至京師詔百官迎謁再拜故事邑司官承命答拜有司
議邑司官卑不可當羣臣請以主左右上勝戴鬢帛承拜兩襠持
命又詔神策軍四百具鹵簿羣臣班迓主乘輅謁憲穆二室欽獻
流涕退詣光順門易服褫冠鎮待罪自言和親無狀帝使中人勞
慰復冠鎮乃入明日主謁太皇太后進封長公主遂廢太和府唐書

本傳

穆宗女 安康

安鳳公主爲道士乾符四年以主在外頗擾人詔與永興天長寧

國興唐四主還南內

唐書本傳○按永興天長寧國三主皆敬宗女興唐文宗女也

宣宗女 萬壽 廣德

萬壽公主下嫁鄭顥下詔先王制禮貴賤共之萬壽公主奉舅姑
宜從士人法舊制車輿以鐐金鈿飾帝曰我以儉率天下宜自近

始易以銅主每進見帝必諄勉篤誨曰無鄙夫家無干時事又曰

太平安樂之禍不可不戒故諸主祇畏帝遂詔夫婦教化之端其

公主縣主有子而寡不得復嫁

唐書本傳

宣宗屬念萬壽公主蓋武皇

世有保護之功也駙馬鄭尚書之弟顥嘗危疾上使訊之使迴上

問公主視疾否曰無何在曰在慈恩寺看戲場上大怒且歎曰我

怪士大夫不欲與我爲親良有以也命名公主公主走輦至立階

下不視父之主太懼涕泣辭謝上責曰豈有小郎病乃親看他處

乎立遣歸宅畢宣宗之世婦禮修飾

幽閑鼓吹

廣德公主下嫁于琮初琮尚永福公主主與帝食怒折匕筯帝曰

此可爲士人妻乎更許琮尚主琮爲黃巢所害主泣曰今日誼不

獨存賊宜殺我巢不許乃縊室中主治家有禮法嘗從琮貶韶州

侍者纔數人郤州縣饋遺凡内外冠婚喪祭主皆身答勞疏戚咸

得其心爲世聞婦

唐書本傳

懿宗女

衛國

衛國文懿公主郭淑妃所生始封同昌下嫁韋保衡咸通十年薨

帝自製挽歌羣臣畢和又許百官祭以金貝寓車廐服火之及葬

帝與妃坐延興門哭以過樞仗衛彌數十里冶金爲俑怪寶千計

實墓中追封及謚

唐書本傳

宣宗希冀遐齡無儲嗣懿宗藩邸常懷危

慄郭美人誕育一女未踰月卒適懿宗傷感之際皇女忽言得活

登極後鍾愛之封同昌公主降韋保衡恩澤無比

北夢瑣言

咸通九年

同昌公主出降宅於廣化里仍罄內庫寶貨以實其宅至於房櫳

戶牖無不以珍異飾之又以金銀爲井欄藥臼食櫃水槽釜鐺盆

甕之屬仍鑲金爲笊籬箕筐製水精火齊琉璃玳瑁等牀悉指以

金龜銀螯又琢五色玉器爲什合百寶爲圖案又賜金麥銀米共

數斛堂中設連珠之帳却寒之簾犀簾牙席龍麝鳳褥又有鸚鵡枕翡翠匣神絲繡被又帶蠲忿犀如意玉又有琴瑟幕紋布巾火蠶綿九玉釵逮諸珍異不可具載自漢至唐公主內降之盛未有也上每賜御饌湯物道路相屬其饌有靈消炙紅乳脯其酒有凝露漿桂花醕其茶則綠華紫英之號公主薨葬於東郊上與淑妃御延興門出內庫金玉駝馬鳳凰麒麟各高數尺以爲威儀其衣服玩具一物已上皆至一百二十昇以絳羅多繡絡金銀瑟瑟爲帳幕者亦各千隊繁華輝煥二十餘里

杜陽雜編

昭宗女

平原

平原公主積善皇后所生帝在鳳翔以主下嫁李茂貞子繼偁后謂不可帝曰不爾我無安所是日宴內殿茂貞坐帝東南主拜殿上繼偁族兄弟皆西向立主徧拜之及帝還朱全忠移茂貞書取

主還京師

唐書本傳

外戚

漢有扶風之竇唐如京兆之韋締好天家皆與國相終始綜其行事固得失之林也而王氏之在元城武氏之在文水者

以非秦產不與焉

漢

竇廣國字少君竇長君其兄竇皇后其姊也少君年四五歲時家貧爲人所畧賣傳十餘家至宜陽從其家之長安聞皇后新立家在觀津姓竇氏廣國去時雖小識其縣名及姓上書自陳召見果是乃厚賜田宅金錢封公昆弟家於長安絳侯灌將軍等曰吾屬不死命且懸此兩人兩人所出微不可不爲擇師傳賓客於是選長者士之有節行者與居竇長君少君由此爲退讓君子不敢以尊貴驕人孝景帝立封廣國爲章武侯長君前死封其子彭祖爲南皮侯吳楚反時竇太后從昆弟子嬰任俠自喜以軍功爲魏其侯

史記外
戚世家

竇嬰字王孫孝文皇后從兄子喜賓客孝文時爲吳相孝景卽位爲
詹事梁孝王朝因燕飲是時上未立太子酒酣上從容曰千秋萬
歲後傳王太后驩嬰進曰天下者高祖天下父子相傳漢之約也
上何以得傳梁王太后由此憎嬰因病免吳楚反上察諸竇無如
嬰賢乃拜爲大將軍守滎陽監齊趙兵七國破封爲魏其侯游士
賓客爭歸之武帝卽位嬰爲丞相舉謫諸竇宗室無行者除其屬
籍以故毀日至乃罷免嬰六年竇太后崩嬰益疏不用諸公稍自
引而怠傲惟灌夫相得驩甚丞相蚡與夫有隙劾灌夫前事得棄
市罪嬰爲請莫能解乃竊出上書立召入具告言灌夫醉飽事不
足誅上曰東朝廷辨之嬰東朝盛推夫善因言蚡短太后怒曰我
在也而人皆藉吾弟令我百歲後皆魚肉之乎上謝曰俱外家故

廷辨之於是上使御史簿責嬰所言灌夫頗不讐劾繫都司空廼

有飛語爲惡言聞上以十二月晦論棄市渭城

漢書本傳

王仲王皇后父也槐里人生男信與兩女而仲死景帝封信爲蓋侯

武帝追尊王仲爲共侯槐里起園邑二百家長丞奉守

漢書外戚傳

陽爲人有智畧梁事敗孝王恐誅齎以千金令求方略解罪於上

陽至長安因客見王長君長君者王美人兄也後封爲蓋侯陽留

數日乘間而請曰竊聞長君弟得幸後宮天下無有而長君行迹

多不循理今梁王恐誅如此則太后怫鬱泣血無所發怒臣恐長

君危於累卵長君曰奈何陽曰長君誠能爲上言之得無竟梁事

太后厚德長君入於骨髓而長君之弟幸於兩宮金城之固也長

君曰諾乘間入言之事果得不治

鄒陽傳

田盼田勝皆王皇后同母弟也王太后母曰臧兒臧兒者故燕王臧

荼孫也爲槐里王仲妻仲死更嫁長陵田氏生男蚡勝景帝崩太子爲皇帝尊太后母臧兒爲平原君封蚡爲武安侯勝爲周陽侯蚡勝貪巧於文辭平原君卒從田氏葬長陵置園比共侯園

史記外戚

世田蚡王皇后同母弟也生長陵爲中大夫辨有口學盤盂諸書

王皇后賢之武帝卽位蚡封爲武安侯新用事卑下賓客欲以傾諸將相六年爲丞相蚡以肺腑爲相入奏事所言皆聽薦人或起家至二千石權移主上治宅甲諸第田園極膏腴市買郡縣器物相屬於道前後羅鐘鼓立曲旃後房婦女以百數諸珍物狗馬玩好不可勝數元光四年夏蚡取燕王女爲夫人太后詔列侯宗室皆往賀酒酣灌夫罵坐蚡怒劾灌夫前事諸灌氏皆得棄市罪春蚡疾上使視鬼者瞻之曰魏其侯與灌夫共欲殺之竟死

漢書田蚡傳

公孫賀北地義渠人賀祖父昆邪景帝時爲隴西守以將軍擊吳楚

有功封平曲侯著書十餘篇賀少爲騎士從軍數有功自武帝爲太子時賀爲舍人及武帝卽位遷太僕賀夫人君孺衛皇后姊也賀由是有寵元光中爲輕車將軍後以車騎將軍從大將軍青出有功封南窳侯後遂代石慶爲丞相自公孫弘後丞相比坐事死石慶數被譴初賀引拜爲丞相不受印綬頓首涕泣曰臣誠不任宰相左右問其故賀曰主上賢明臣不足以稱從是殆矣賀子敬聲代賀爲太僕敬聲以皇后姊子驕奢不奉法征和中擅用北軍錢千九百萬發覺下獄時詔捕陽陵朱安世不得賀自請逐捕安世以贖敬聲罪上許之果得安世安世者京師大俠也聞賀欲以贖子笑曰丞相禍及宗矣安世遂從獄中上書告敬聲與陽石公主私通且上甘泉當馳道理偶人祝詛有惡言下有司案驗賀窮治所犯遂父子死獄中

王商字子威涿郡蠡吾人也徙杜陵商父武武兄無故皆以宣帝舅
封侯商少爲太子中庶子以肅敬敦厚稱父薨商嗣侯擢爲諸曹
侍中中郎將元帝時至右將軍光祿大夫時定陶共王愛幸幾代
太子商爲外戚重臣擁佑太子頗有力焉成帝卽位徙爲左將軍
帝元舅大司馬大將軍王鳳顯權行多驕僭商議論不能平鳳鳳
知之亦疏商建始三年秋京師民無故相驚言大水至長安中大
亂天子親御前殿召公卿議大將軍鳳以爲可令吏民上長安城
以避水商獨曰此必訛言也不宜令上城重驚百姓有頃長安中
稍定問之果訛言上於是壯商之固守數稱其議明年代匡衡爲
丞相商爲人多質有威重容貌絕人河平四年單于來朝引見白
虎殿丞相商坐未央廷中單于前拜謁商商起離席與言單于仰
視商貌大畏之遷延却退天子聞而歎曰此正漢相矣初鳳怨商

使人上書言商閨門內事下其事司隸先是皇太后嘗詔問商女欲以備後宮商以病對不入及商以閨門事見考更欲內女爲援乃因新幸李婕妤家白見其女大中大夫蜀郡張匡上書以爲姦謀不可測度詔收丞相印綬商發病歐血薨謚曰戾侯有司奏商罪過未決請除國邑有詔長子安嗣爵爲樂昌侯至長樂衛尉光祿勳元始中王莽誅不附已者安見被以罪自殺國除

漢書本傳

張臨家杜陵平原侯勃薨子臨嗣臨亦謙儉每登閣殿歎曰桑霍爲我戒豈不厚哉臨尚敬武公主薨子放嗣鴻嘉中上欲遵武帝故事與近臣游宴放以公主子開敏得幸取皇后弟平恩侯許嘉女上爲放供張充以乘輿服飾號爲天子取婦皇后嫁女大官私官並供其第兩宮使者冠蓋不絕賞賜以千萬數放爲侍中中郎將與上臥內愛殊絕嘗從爲微行出游關雞走馬長安中積數年

上諸舅皆害其寵白太后太后甚以過放時數有災異議者歸咎放等丞相宣御史大夫方進奏放驕蹇縱恣奢淫不制不宜宿衛上不得已左遷放爲北地都尉數月復徵入侍中太后以放爲言出爲天水屬國都尉歲餘徵放歸第視母公主疾主瘳出放爲河東都尉後復徵放爲侍中歲餘遣就國成帝崩放思慕哭泣而死

漢書張湯傳

馮參字叔平上黨潞人徙杜陵奉世子也學通尚書少爲黃門郎給事中宿衛十餘年參昭儀少弟竟寧中以王舅出補渭陵食官令以病免官綏和中封參爲宜鄉侯參之國上書願至中山見王太后行未到而王薨王病時上奏願貶參爵以關內侯食邑留長安上憐之下詔還參京師以列侯奉朝請五侯皆敬憚之丞相翟方進亦甚重焉數謂參物禁太甚今五侯至貴與之並列宜少詘節

而君侯盛修容貌以威嚴加之非所以自益也參性好禮儀終不改其恒操頃之哀帝卽位帝祖母傳太后用事追怨參姊中山太后陷以祝詛大逆之罪參以同產當坐謁者承制召參詣廷尉參自殺且死仰天歎曰參父子兄弟皆備大位身至封侯今被惡名而死姊弟不敢自惜傷無以見先人於地下死者十七人衆莫不憐之

漢書馮奉世傳○按馮氏父子兄弟才品卓然奉世以武功顯野王遂立以治績聞參矜嚴好禮皆不由女寵以進乃姊弟非辜橫罹毒焰不由女寵以進而實由女寵以亡參之遇視父兄有足悲者故獨以外戚著於篇

班況舉孝廉爲郎積功勞至上河農都尉大司農奏課連最入爲左

曹越騎校尉成帝之初女爲倖仔致仕就第貲累千金徙昌陵昌

陵後罷占數於長安

漢書叙傳○按班氏如侍中昆弟俱有風節可觀東京而後文學武功尤極一門之盛況

因女氏入宮占籍長安實扶風始遷祖也故書入外戚云

杜業延年之孫緩之子也業有材能以列侯選爲太常數言得失不

事權貴後坐法免官哀帝卽位上書言王氏世權日久又言宜爲恭王立廟京師所言皆合指施行復爲太常會司隸奏業選舉不實坐免官復就國發病死業成帝初尚帝妹潁邑公主主無子薨業家上書求還京師與主合葬不許

漢書杜周傳○按杜氏初徙茂陵至延年復徙杜陵

竇融字周公扶風平陵人七世祖廣國孝文皇后之弟封章武侯融早孤居攝中爲強弩將軍封建武男家長安中王莽末拜波水將軍莽敗降更始爲張掖屬國都尉撫結雄傑懷集羗虜得其歡心更始敗河西吏人推融行河西五郡大將軍事光武卽位遂決策東向建武五年夏遣長史劉鈞奉書獻馬帝賜融璽書授融爲涼州牧會隗囂反融乃與五郡太守共上疏請師期帝深嘉美之賜融外屬圖及太史公五宗外戚世家魏其侯列傳詔報曰每追念外屬孝景皇帝出自竇氏定王景帝之子朕之所祖昔魏其一言

繼統以正長君少君尊奉師傅修成淑德施及子孫此皇太后神靈上天祐漢也將軍所讓隗囂書非忠孝慤誠孰能如此今關東已定大兵悉西將軍其抗厲威武以應期會融被詔即將兵入金城因大兵未進引還八年夏車駕西征隗囂融率步騎數萬與大軍會遂共進軍囂衆大潰帝高融功封融爲安豐侯弟友爲顯親侯遣還鎮及隴蜀平詔融奏事京師拜爲冀州牧又遷大司空融自以非舊臣一旦入朝在功臣右數辭讓爵位帝不得已乃策免融二十三年行衛尉事弟友爲城門校尉兄弟並典禁兵友卒融長子穆尚內黃公主代友爲城門校尉穆子勲尚泚陽公主友子固亦尚涅陽公主顯宗卽位融從兄子林爲護羌校尉自祖及孫官府邸第相望京邑奴婢以千數親戚功臣中莫與爲比永平二年林以罪誅帝數下詔切責融融惶恐乞骸骨詔令歸第養病聽

上衛尉印綬穆等交通屬託干亂政事帝怒盡免穆等官會
年七十八謚曰戴侯帝以穆不能修尚常令謁者一人監護其家
居數年謁者奏穆怨望帝令將家屬歸本郡惟勲以主壻留京師
穆捕繫死平陵獄勲亦死洛陽獄十四年封勲弟嘉爲安豐侯奉
融後固字孟孫少以尚公主爲黃門侍郎好覽書傳喜兵法顯宗
卽位遷中郎將帝欲遵武帝故事擊匈奴通西域以固明習邊事
拜奉車都尉出屯涼州明年率酒泉敦煌張掖甲卒及羌胡萬二
千騎出酒泉塞至天山擊呼衍王斬首千餘級呼衍王走追至蒲
類海留吏士屯伊吾廬城時諸將惟固有功加位特進明年復出
玉門擊西域遂破白山降車師在邊數年羌胡服其恩信肅宗卽
位以公主修勅慈愛累世崇重加號長公主增邑三千戶徵固爲
大鴻臚復爲衛尉固久歷大位性謙儉愛人好施士以此稱之卒

謚曰文侯

後漢書本傳

馬廖馬防馬光扶風茂陵人伏波將軍援之子也廖字敬平少以父任爲郎明德皇后旣立拜虎賁中郎將顯宗崩爲衛尉時皇太后躬履節儉事從簡約廖慮美業難終上疏長樂宮勸成德政太后深納之廖性質誠畏慎盡心納忠不屑毀譽有司連據舊典奏封廖等累讓建初四年遂受封爲順陽侯每有賞賜輒辭讓京師以是稱之子豫爲步兵校尉太后崩馬氏失勢豫投書怨誹又防光奢侈好樹黨與有司奏免豫遣廖防光就封後詔還廖京師永元四年卒和帝以廖先帝之舅厚加賄賂謚曰哀侯防字江平永平十二年與弟光俱爲黃門侍郎肅宗卽位拜防中郎將稍遷城門校尉建初二年金城隴西羌反拜防行車騎將軍事將兵擊破之還手車騎將軍貴寵起九卿絕帝光自越騎校尉遷執金吾四年

封防潁陽侯光許陽侯防數言政事多見採用子鉅爲常從小侯
六年正月鉅當冠特拜黃門侍郎肅宗自臨冠之防兄弟貴盛奴
婢各千人已上資產巨億多聚聲樂賓客奔湊刺史守令多出其
家歲時賑給鄉閭故人莫不周給防又多牧馬畜賦斂羌胡帝數
加譴勅由是權勢稍損賓客亦衰八年因兄子豫怨謗有司奏防
兄弟奢侈踰僭悉免就國詔曰舅氏一門俱就國封四時陵廟無
助祭先后者朕甚傷之其令許侯思憊田廬有司勿復請以慰朕
渭陽之情光爲人小心周密帝特親愛之乃復位特進子康黃門
侍郎竇憲誅憲奴誣光與憲逆自殺家屬歸本郡本郡復殺康而
防及廖子遵皆徙封丹陽防後以江南下濕乞歸本郡卒子鉅
嗣爲長水校尉永初七年鄧太后詔諸馬子孫還京師復紹封光
子朗爲合鄉侯

後漢書
本傳

竇憲字伯度融曾孫也父勲被誅建初二年女弟立爲皇后拜爲郎
稍遷侍中虎賁中郎將弟篤爲黃門侍郎憲恃宮掖聲勢遂以賤
直請奪沁水公主園田後發覺帝召憲切責使以田還主雖不繩
其罪亦不授以重任和帝卽位太后臨朝憲以侍中內幹機密出
宣詔命肅宗遺詔以篤爲虎賁中郎將篤弟景璜並中常侍於是
兄弟皆在親要之地齊王子都鄉侯暢來弔國憂得幸太后憲懼
分宮省之權遣客刺殺暢事覺太后怒閉憲內宮憲懼誅自求擊
匈奴以贖死會南單于請兵北伐乃拜憲車騎將軍發兵出塞明
年與北單于戰於稽落山大破之遂登燕然山刻名勒功紀漢威
德而還詔拜憲大將軍是時篤爲衛尉景璜皆侍中奉車駙馬都
尉明年詔封憲冠軍侯篤鄠侯景汝陽侯璜夏陽侯憲不受封遂
將兵出鎮京州明年復擊北虜於金微山大破之憲旣負重勞陵

肆滋甚帝慮其爲亂會班師還京師詔收憲大將軍印綬更封爲冠軍侯及篤景瓌皆遣就國帝以太后故不欲名誅憲爲選嚴能相督察之憲篤景到國皆迫令自殺瓌以素自修不被逼迫徙封羅侯初竇后之譖梁氏憲等豫有謀焉永元十年梁棠兄弟徙九真還路由長沙逼瓌令自殺鄧后臨朝詔諸竇前歸本郡者與安

豐侯萬全俱還京師

後漢書本傳

宋楊扶風平陵人也以恭孝稱於鄉閭不應州郡之命楊姑卽明德馬后之外祖母也馬后聞楊二女皆有才色迎而訓之永平末選入太子宫肅宗卽位並爲貴人建初三年大貴人生慶立爲皇太子徵楊爲議郎褒賜甚渥後竇皇后誣譖貴人母子遂廢慶爲清河王二貴人同時自殺於是免楊歸本郡郡縣因事復捕繫之楊友人前懷令山陽張峻左馮翊沛國劉均等奔走解釋得以免罪

楊失志惓惓卒於家和帝時慶上言外祖母王年老遭病下土無醫藥願乞詣洛陽療疾於是詔宋氏悉歸京師除慶舅衍俊蓋暹等皆爲郎安帝立封衍爲盛鄉侯又追封謚宋楊爲當陽穆侯楊四子皆爲列侯食邑各五千戶宋氏爲卿校侍中大夫謁者郎吏

十餘人

後漢書清河王傳

耿襲茂陵人弇弟牟平侯舒之子也舒卒襲嗣尚顯宗女隆慮公主襲卒子寶嗣寶女弟爲清河孝王妃安帝立以妃爲甘園大貴人帝以寶元舅之重使監羽林左車騎位至大將軍與中常侍樊豐帝乳母王聖等譖廢皇太子及排陷太尉楊震議者怨之寶弟子承襲公主爵爲林慮侯位至侍中安帝崩閹太后以寶等阿附嬖倖共爲不道策免寶及承遣就國寶自殺大貴人數爲耿氏請陽

嘉三年詔封寶子箕牟平侯恒爲陽亭侯承爲羽林中郎將貴人

薨大將軍梁冀從承求貴人珍玩不能得冀怒奪其封承恐遂亡

匿於穰數年冀推迹得之族其家

後漢書耿弇傳

班始超長子雄之子也尚清河孝王女陰城公主主順帝之姑貴驕

淫亂與嬖人居帷中而召始入使伏牀下始積怒遂拔刃殺主帝

大怒腰斬始

後漢書班超傳

竇章字伯向安豐侯萬全少子也少好學有文章與馬融崔瑗同好

更相推薦永初中三輔遭羌寇章避難東國家於外黃躬勤孝養

講讀不輟太僕鄧康聞其名欲與交章不肯往康以此益重焉遂

薦爲校書郎順帝初章女選入掖庭爲貴人擢章羽林郎將遷屯

騎都尉章謙虛下士收進時輩甚得名譽是時梁竇各有賓客交

構其間章推心待之故得免於患貴人歿帝禮待之無衰中子唐

有俊才官虎賁中郎將

後漢書本傳

竇武字游平安豐戴侯融元孫父奉定襄太守武少以經行著稱延熹八年長女選入掖庭爲貴人拜武郎中其冬貴人立爲皇后武遷越騎校尉封槐里侯明年拜城門校尉在位多辟名士清身疾惡禮賂不通兄子紹爲虎賁中郎將性疎簡奢侈武上書求退紹位又自責不能訓導當先受罪由是紹更遵節莫敢違犯時國政多失內官專寵帝崩武入白太后徵立靈帝拜武爲大將軍論定策功封聞喜侯武旣輔朝政常有誅剪宦官之意數白誅曹節等太后猶豫未忍武乃奏免黃門令魏彪以所親小黃門山冰代之使冰奏長樂尚書鄭璠送北寺獄璠辭連及曹節王甫冰卽奏收節等時武出宿歸府長樂五官史朱瑀盜發武奏因夜召所親叩血共盟誅武等節聞之白帝御德陽前殿拜王甫黃門令持節至北寺獄收冰殺之出鄭璠使持節捕收武等武馳入步兵營與紹

共射殺使者召會北軍五校士數千人屯都亭下詔少府周靖與
中郎將張奐率五營士討武王甫出與奐等合明旦悉軍闕下與
武對陣營府素畏服中官於是武軍稍稍歸甫武紹皆自殺收捕
宗親賓客悉誅之徙武家屬日南武府掾桂陽胡騰獨殞殮行喪
武孫輔時年二歲節等捕之急騰逃輔於零陵界以爲己子使聘
娶焉後舉桂陽孝廉建安中荊州牧劉表辟爲從事使還實姓表
卒曹操定荊州辟丞相府從征馬超爲流矢所中死後漢書本傳
耿援羽林左監顯之子也尚桓帝妹長社公主爲河陽太守後曹操
誅耿氏惟援孫弘存焉後漢書耿弇傳

張緝馮翊高陵人既之子東莞太守嘉平中女爲皇后徵拜光祿大
夫位特進妻向爲安郡鄉君與中書令李豐同謀誅三國志張既傳魏畧

曰緝字敬仲太和中爲溫令會諸葛亮出緝上便宜詔以問中書令孫資資以爲有籌畧遂召拜騎都尉參征蜀軍軍罷入爲尚書郎以稱職爲明帝所識緝性矜躁數爲國家陳擊吳蜀形勢緝與李豐通家又居相側近豐被收事與緝連遂收送廷尉賜死獄中

其諸子并誅

張既傳注

李豐中書令結后父光祿大夫張緝謀以夏侯元輔政豐內握權柄子尚公主與緝俱馮翊人故緝信之嘉平六年二月當拜貴人豐等欲因御臨軒諸門有陛兵誅大將軍以元代之大將軍微聞其謀請豐相見豐往卽殺之事下有司廷尉請論如法詔書齊長公主先帝遺愛原其三子死命於是豐緝皆夷三族

三國志夏侯尚傳

魏書

曰初豐以身處機密息韜又以列侯給事中尚齊長公主有內外之重心不自安緝嘗病創卧豐遣韜省病韜屏人語緝曰韜尚公

主父子在機近大將軍秉事嘗懷深憂君侯雖有后父之尊安危未可知皆與韜家同慮者也韜父欲與君侯謀之緝默然良久曰同舟之難吾焉所逃此大事不捷卽禍及宗族韜往報豐密語黃門監蘇鑠等皆許諾豐復密告緝緝遣子邈與豐相結同謀起事魏畧曰豐字安國故衛尉李義子也豐仕歷三朝不以家計爲意韜尚公主豐常約勅不得有所侵取得賜輒施親族死後有司籍其家家無餘積

夏侯尚傳注

晉

楊文宗武元皇后父也其先事漢四世爲三公文宗爲魏通事郎襲封務亭侯早卒以后父追贈車騎將軍謚曰穆

晉書外戚傳

楊駿字文長弘農華陰人以后父超居重任自鎮軍將軍遷車騎將軍封臨晉侯帝自太康以後天下無事始寵后黨請謁公行駿及

珽濟勢傾天下時人有三楊之號及帝疾篤后奏帝以駿輔政遂當寄託之重惠帝卽位進太傅大都督假黃鉞錄朝政慮左右間已以其甥段廣張邵爲近侍之職又多樹親黨皆領禁兵弟珽濟數相諫止駿不能用殿中中郎孟觀李肇素不爲駿所禮陰構駿於賈后賈后令肇報楚王瑋求入朝瑋至觀肇乃啓帝作詔廢駿以侯就第東安公繇率殿中兵四百人討駿尋而殿中兵出燒駿府駿逃於馬廐殺之親黨皆夷三族永寧初詔曰舅氏失道宗族隕墜其以蕞亭侯楊超爲奉朝請騎都尉以慰蓼莪之思焉珽字文琬位尚書令衛將軍素有名稱得幸於武帝以兄貴盛知權寵不可居自乞遜位前後懇至終不許珽初以退讓稱晚乃合朋黨構出齊王攸自是素論盡矣珽臨刑稱寃當時皆謂宜爲申理而賈氏族黨待諸楊如讐促行刑者遂斬之濟字文通歷鎮南征北

將軍遷太子太傅濟有才藝與兄珧深慮盛滿與諸甥李斌等共切諫駿駿遂踈濟後與諸兄俱見害難發之夕東宮召濟濟謂裴楷曰吾將何之楷曰子爲保傅當至東宮濟好施久典兵馬所從四百餘人皆秦中壯士欲救濟濟已入宮莫不歎恨

晉書本傳

杜乂字弘理成恭皇后父鎮南將軍預孫性純和夷姿容有盛名於江左襲封當陽侯辟公府掾爲丹陽丞無男生后而乂終妻裴氏娶居養后以禮自防甚有德音咸康初追贈金紫光祿大夫謚曰穆封裴氏爲高安鄉君孝武時進廣德縣君裴氏壽考百姓號曰杜姥初司徒蔡謨甚器重乂嘗言於朝曰恨諸君不見杜乂也其爲名流所重如此

晉書外戚傳

北魏

姚黃眉興之子太宗昭哀皇后之弟姚泓滅黃眉來歸太宗厚禮待

之尚陽翟公主拜駙馬都尉世祖卽位拜太常卿卒贈隴西王謚

曰獻黃眉寬和溫厚希言得失世祖悼惜之

魏書外戚傳

宿石朔方人赫連屈丐弟文陳曾孫也天興二年文陳歸闕太祖嘉

之以宗女妻焉祖若豆根太宗時賜姓宿氏父沓干世祖時從征

平涼有功賜爵漢安男後從討蠕蠕戰歿石年十三襲爵又改爵

義陽子嘗從獵高宗親欲射虎石叩馬諫引帝至高原上後虎騰

躍殺人詔曰石爲忠臣後有犯罪勿坐尚上谷公主拜駙馬都尉

進爵太山公爲北中道都大將卒謚康

魏書本傳

韋崇京兆杜陵人閭從子司徒從事中郎高祖納其女爲充華嬪除

南潁川太守不好發摘細事常云何用小察以傷大道高祖聞而

嘉賞遷洛以崇爲司州中正復爲河南邑中正以平直見稱出爲

郎部太守又除華山太守卒

魏書韋

楊愔字遵彥弘農華陰人兒時風度深敏及長能清言美音制人士莫不敬異孝莊幽崩潛竄累載屬齊神武至信都投刺引見卽署行臺郎中轉大行臺右丞於時霸圖草創文檄教令皆自愔出遷給事黃門侍郎武定末起拜吏部尚書天保初遷尚書右僕射尚太原長公主卽魏孝靜后也又改封華山郡公徙尚書令濟南嗣業任遇益隆推誠體道時無異議乾明元年爲孝昭帝所誅愔早著聲譽風表鑒裁爲朝野所稱自尚公主後衣紫羅袍金鏤大帶遇李庶謂曰我此衣服都是內裁見子不能無愧及居端揆經綜機衡神無滯用自天保五年已後維持匡救實有賴焉文宣大漸以常山長廣二王位地親逼深以後事爲念愔受遺輔政二王乃伏家僮數十人於錄尚書後室愔被拳杖亂毆血流率高歸彥賀

拔仁斛律金擁送御前一目已出遂斬之太皇太后臨惜喪哭曰
楊郎忠而獲罪以御金爲一眼親內之曰以表我意惜子獻天和
皆尚帝姑

北史楊
播傳

北周

韋世康京兆杜陵人孝寬兄襲之子也幼沉敏有器度年十歲州辟
主簿尚周文帝女襄樂公主從武帝平齊授司州總管長史時東
夏初定百姓未安世康綏撫之士庶胥悅入爲司會中大夫尉遲
迥之亂隋文帝謂世康曰汾絳舊是周齊分界恐生搖動今以委
公授絳州刺史闔境清肅世康性恬素好古不以得喪干懷在州
有止足之志轉吏部尚書選用平允請托不行以母憂去職開皇
十三年復拜吏部尚書前後多所進拔稱爲廉平嘗因侍宴乞骸
骨上曰冀與公共理天下今之所請深乖本望於是出拜荊州總

管爲政簡靜百姓愛悅卒於州謚曰文

北史本傳

韋孝寬子諶年十歲

魏文帝欲以女妻之寬辭以兄子世康年長帝嘉之遂以妻世康

周書韋

孝寬傳

滕王瓚字恒生一名慧文帝之弟也仕周以武元軍功封竟陵郡公

尚周武帝妹順陽公主美姿容好書愛士甚有時譽號楊三郎武

帝甚親愛之平齊之役諸王咸從留瓚居守文帝作相瓚恐爲家

禍陰有圖帝計及受禪立爲滕王拜雍州牧後坐事以王就第瓚

妃宇文氏素與獨孤皇后不平至是鬱鬱不得志陰有咒詛帝命

出之瓚不忍離絕固請帝不得已從之宇文氏竟除屬籍由是恩

禮更薄開皇十一年暴薨

北史隋宗室諸王傳○按瓚係隋文母弟以旣列王封不入宗室又因宇文主

壻之故構讐宮闈遂至棣萼失歡故特以北周外戚著於篇

竇毅字天武扶風平陵人熾兄子也深沉有器度魏孝武初起家爲

員外散騎侍郎時齊神武擅朝慨然有殉主之志孝武西遷遂從入關擒竇泰復弘農戰沙苑皆有功累授驃騎大將軍開府儀同三司保定三年拜大將軍太祖時突厥許納女於我齊人亦重幣求婚狄欲有悔朝廷以毅地兼勛戚素有威重乃命爲使及至齊使亦在突厥猶有貳志毅抗言正色以大義責之累旬乃定朝議嘉之隋開皇初拜定州總管累居藩鎮咸得民和薨於州謚曰肅毅溫 and 謹慎尚太祖第五女襄陽公主特爲朝廷所委信雖任兼出入未嘗有矜情之容時人以此稱之子賢字託賢志業通敏少

知名

周書竇熾傳

隋

竇榮定熾子也沉深有器局周文帝見而奇之授平東將軍從戰北

芒以功拜上儀同從平齊加上開府拜前將軍其妻則隋文帝長

姊安成長公主也文帝與之情契甚厚榮定亦知帝有人君之表
尤相推結及受禪坐事除名公主曰天子姊乃作田舍兒妻尋拜
右武侯大將軍上數幸其第恩錫甚厚突厥寇邊爲行軍元帥數
挫其鋒突厥請盟而去進爵安豐郡公歲餘拜右武衛大將軍帝
欲以爲三公榮定上書固辭乃止及卒贈陳國公謚曰懿北史竇熾傳
韋壽字世齡父孝寬周上柱國鄖國公壽以貴公子早有令譽周武
帝親征高氏拜京兆尹委以後事以父軍功拜儀同三司封滑國
公俄以父喪去職高祖受禪起令視事尋遷恒毛二州刺史有治
名開皇十年卒謚曰定仁壽中高祖爲晉王廣納其女爲妃以其

子保巒嗣

隋書本傳

唐

竇威字文蔚扶風平陵人太穆皇后其從兄弟女也家世貴子弟皆

喜武力獨威尚文內史令李德林舉秀異授秘書郎不調者十年
蜀王秀辟爲記室威以秀多不法謝疾去秀廢府屬皆得罪威獨
免高祖入關召補大丞相府司錄叅軍威乃裁定制度帝曰威今
之叔孫通也武德元年授內史令每論政事得失必陳古爲諭帝
嘗引入卧內謂曰昔周有八柱國吾與公家是也今我爲天子而
公爲內史令事固有不等耶威懼謝曰臣家在漢再爲外戚至元
魏有三皇后今陛下龍興臣復以姻戚進懼不克任帝笑曰公以
三后族夸我耶關東人與崔盧婚者猶自矜大公世爲帝戚不亦
貴乎後寢疾帝臨問卒謚曰靖威從兄子抗字道生父榮定母隋
文帝姊安成公主也抗以帝甥蚤貴入太學釋褐千牛備身累轉
梁州刺史將之官文帝幸其第酣宴如家人禮母卒數號絕詔宮
人節哭歲餘爲岐州刺史轉幽州總管所至以寬惠聞抗與高祖

少相狎及楊元感反抗謂高祖曰元感爲我先耳李氏名在圖錄
天所啓也高祖曰公無妄言煬帝遣抗出靈武連護長城聞高祖
已定京師喜曰此吾家壻豁達有大度真撥亂主也因歸長安高
祖見之喜握手曰李氏果王何如因置酒爲樂以兄呼之宮中稱
爲舅後從秦王平薛舉功第一又從征王世充東都平冊勲於廟
賜女樂一部卒贈司徒謚曰密

唐書本傳

抗弟慶性和厚工草隸大業

末爲南郡太守爲盜賊所害慶弟璉亦工草隸頗解鐘律歷潁川

南郡扶風太守

北史竇熾傳

宇文士及字仁人京兆長安人父述隋右衛大將軍開皇末以述勲
封新城縣公尚煬帝女南陽公主爲尚輦奉御從幸江都兄化及
謀逆以主壻忌之弗告已弒帝乃封蜀王初士及爲奉御高祖任
殿中少監雅自歎結及從化及至黎陽化及兵日蹙士及勸歸命

不從詭求督饗俄而歸帝時士及女弟爲昭儀有寵由是見親禮從秦王平宋金剛錄功復隋舊封以宗室女妻之遷王府驃騎將軍王卽位拜中書令以本官檢校涼州都督時突厥數入寇士及欲立威鎮耀邊鄙每出入盛陳兵衛又痛折節下士或告其反訊無狀召爲殿中監改蒲州刺史政尚寬簡人皆宜之擢右衛大將軍復爲殿中監卒謚曰恭黃門侍郎劉洎曰士及居家侈肆不可謂恭乃改曰縱

唐書本傳

竇誕抗第三子也隋仁壽中起家爲朝請郎義寧初辟丞相府祭酒封安豐郡公尚高祖女襄陽公主從太宗征薛舉爲元帥府司馬轉太常卿高祖諸少子荆王元景等未出宮者十餘王國司家事皆令誕主之出爲梁州都督貞觀初召拜右領軍大將軍莘國公復拜宗正卿太宗嘗與之言昏忘不能對詔誕可光祿大夫

卒謚曰安

舊唐書
竇威傳

楊師道恭仁少弟弘農華陰人也隋末自洛陽歸國授上儀同尋尚桂陽公主超拜吏部侍郎貞觀七年代魏徵爲侍中性周慎謹密未嘗漏洩內事退朝後必引當時英俊宴集團池文會之盛當時莫比雅善篇什又工草隸酣賞之際援筆直書有如宿構太宗每見師道所製必吟諷嗟賞之十三年轉中書令太子承乾逆謀事洩師道妻前夫之子趙節與承乾通謀師道微諷太宗冀活之由是罷知機密轉吏部尚書師道貴家子四海人物未能委練所署用多非其才而深抑貴勢親黨以避嫌疑時論譏之太宗嘗謂侍臣曰師道性行純善而情實怯懦未甚更事緩急不可得力二十一年卒贈并州都督子豫之尚巢刺王女壽春縣主居母喪與永嘉公主淫亂爲主壻竇奉節所擒具五刑而殺之

舊唐書楊
恭仁傳

薛萬徹本燉煌人後徙京兆咸陽萬均之弟也歸高祖授車騎將軍
事隱太子太子誅與數十騎亡之南山秦王數使貸諭乃出從李
靖討突厥以功歷右衛將軍蒲州刺史副李勣擊薛延陀戰磧南
爲先鋒斬首三千級獲馬萬五千改左衛將軍尚丹陽公主加駙
馬都尉貞觀二十二年以青邱道行軍總管帥師伐高麗次鴨渚
水以奇兵襲大行城斬虜將所夫孫遂傳泊汭拔其城萬徹在軍
中副將裴行方言其怨望李勣曰萬徹位大將軍親主壻而內懷
不平罪當誅詔除籍徙邊會赦還永徽二年授寧州刺史入朝與
房遺愛昵甚遺愛曰若國有變當與公共輔荆王謀洩下獄誅

薛萬
均傳

唐書

蘇勗京兆武功人瓌從父也武德中爲秦王府文學館學士貞觀中
尚南康公主拜駙馬都尉累遷魏王泰府司馬勗博學有美名甚

爲泰所重因勸泰請開文學館引才名之士撰括地志後歷吏部

郎太子左庶子卒

舊唐書
蘇瓌傳

喬知之同州馮翊人父師望尚高祖女廬陵公主拜駙馬都尉官至

同州刺史知之與弟侶備並以文詞知名知之尤稱俊才所作篇
咏時人多諷誦之則天時遷左司郎中有侍婢曰窈娘美麗善歌
舞爲武承嗣所奪知之因作綠珠篇以寄情密送婢婢感憤自殺
承嗣大怒因諷酷吏羅織知之侶開元初爲兗州都督備預脩三
教珠英長安中卒於襄陽令

舊唐書
文苑傳

杜荷杜陵人如晦子也尚城陽公主賜爵襄陽郡公授尚乘奉御貞

觀中與太子承乾謀反坐死

舊唐書杜
如晦傳

韋元貞初爲普州參軍以女爲皇太子妃擢拜豫州刺史中宗嗣位
妃爲后及帝降爲廬陵王元貞配流欽州而死后母崔氏爲欽州

首領寧承兄弟所殺元貞有四子洵浩洞泚亦死於容州及中宗復位追贈元貞爲上洛郡王遣使迎元貞及崔氏喪柩歸京師又

遣廣州都督周仁軌率兵斬寧承兄弟以其首祭于崔氏及柩至

上與后登長樂宮望喪而泣加贈元貞爲鄴王謚文獻舊唐書外戚傳高

宗大漸顧命裴炎輔少主旣而中宗欲以后父韋元貞爲侍中炎

不可中宗不悅謂左右曰我讓國與元貞豈不得何爲惜侍中炎

懼遂與則天定策廢中宗幽於別所大唐新語韋溫者中宗廢后從父

兄也初試吏坐賊斥神龍初擢宗正卿遷禮部尚書封魯國公弟

湑自洛州戶曹參軍事連拜左羽林大將軍曹國公湑子捷尚成

安公主溫從弟濯尚定安公主並拜駙馬都尉捷爲右羽林將軍

景龍三年溫同中書門下三品遙領揚州大都督湑初兼脩文館

學士時熒惑久留羽林后惡之湑從至溫泉后毒殺之以塞變帝

崩后專政畏有變勅溫盡總內外兵守省中又以從子播提從弟
璿高嵩分領左右羽林軍元宗兵夜起將軍葛福順攻元武門斬
播璿高嵩梟首以徇后死遲旦斬溫分捕諸韋子弟無少長皆斬

唐書外
戚傳

崔無詖京兆長安人本博陵舊族父從禮中宗韋庶人之舅景龍中
衛尉卿時中書令蕭至忠才位素高甚承恩顧勅亡先女冥婚韋
庶人亡弟無詖婚至忠女后爲女家中宗爲兒家供擬甚厚時人
爲之語曰皇后嫁女天子娶婦及庶人敗至忠女亦死無詖坐累
久貶開元中爲益州司馬會楊國忠爲新都尉因事引用之累轉
滎陽郡太守安祿山率衆南向無詖召募拒之及賊陷滎陽無詖
及官吏盡爲賊所虜

舊唐書
忠義傳

周仁軌京兆萬年人后母族也爲并州長史殘酷嗜殺戮異日見堂

下有斷臂惡之送於野數昔往視故在是月韋后敗使者誅仁軌

刑人舉刀仁軌承以臂墮地乃悟

唐書外戚傳

竇孝謚刑部尚書誕之子昭成皇后父也則天時歷潤州刺史長壽

二年后母龐氏被酷吏所陷誣與后咒詛不道孝謚左遷羅州司

馬卒子希城希球希瓘並流嶺南神龍初隨例雪免景雲年追贈

孝謚太尉函國公元宗卽位加贈太保希城等以舅氏甚見優寵

希城累遷太子少傅函國公尋卒希球官太子賓客封冀國公開

元二十七年卒謚曰靖希瓘初賜爵畢國公後改名瓘元宗以早

失太后尤重外家瓘兄弟三人皆國公食實封瓘子鐸又尚元宗

女永昌長公主而兄弟皆貪鄙過自封殖瓘又甚之卒贈司徒瓘

從父弟維鑒好學以撰著爲業時宗族咸以外戚崇飾輿馬維鑒

獨清儉自守官至水部郎中卒撰吉凶禮要二十卷行於世

舊唐書外

臧傳

楊肱交本名璈思訓孫也少襲爵觀國公尚中宗女長寧公主預誅

張易之有功賜實封五百戶

舊唐書楊恭仁傳

中宗之在春宮也妙簡才

地將降天孫公以選尚長寧郡主累遷左衛郎將神龍元祀中興
在運預聞大策克樹休勲貴主宜家既增湯沐列侯傳國復錫山
川至是始襲觀國公拜駙馬都尉累遷秘書監坐事左出巴州刺
史復左轉廊亭許絳四州別駕公性明敏有器韻不恃貴而傷義
不怙寵而廢公奉以周旋加之撝挹雖在降出無他悔恡此公之
以道終始者也

張九齡撰楊肱交墓誌

王仁皎元宗王庶人父也景龍中官至長上果毅元宗卽位以后父
歷將作大匠太僕卿遷開府儀同三司封祁國公仁皎不預朝政
但厚自奉養積子女財貨而已卒贈太尉官供塋事柩車既發上

於望春亭遙望之令張說爲其碑文元宗親書石焉

舊唐書外戚傳

子守

一與后學生帝微時與雅舊後詔尚清陽公主從討太平主有功

由尚乘奉御遷殿中少監累進太子少保襲父爵被遇良渥后廢

貶柳州別駕至藍田賜死

唐書外戚傳

韋堅字子全京兆萬年人姊爲惠宣太子妃妹爲皇太子妃中表貴

盛故仕最蚤由秘書丞歷奉先長安令有幹名見宇文融楊沔矜

父子以聚斂進乃運江淮租賦所在置吏督察以佐國稟歲終增

鉅萬擢陝郡太守水陸運使堅乃壅渭爲堰絕灞澇而東注永豐

倉下復與渭合初澆水銜苑左有望春樓堅於下鑿爲潭以通漕

二年而成帝爲升樓詔群臣臨觀豫取洛汴宋山東小斛舟三百

首貯之潭篙工柁師皆爲吳楚服每舟署某郡以所產陳其上堅

跪取諸郡輕貨上於帝惠宣妃亦出寶物供具帝大悅名潭曰廣

運堅進兼江淮租庸轉運處置等使又兼御史中丞封韋城縣男
堅妻姜皎女李林甫舅子也初甚昵比既見其寵惡之堅亦銳於
進又與左相李適之善林甫授堅刑部尚書奪諸使以楊沱代
之堅失職稍怨望隴右河西節度使皇甫惟明數於帝前稱堅才
林甫知之惟明故爲忠王友王時爲皇太子矣正月望夜惟明與
堅宴集林甫奏堅外戚與邊將私且謀立太子有詔訊鞫林甫使
沱矜等文致其獄帝貶堅縉雲太守籍其家堅諸弟訴枉帝大怒
太子懼表與妃絕復貶堅江夏別駕未幾長流臨封郡弟蘭冰芝
子諒皆謫去歲中遣監察御史羅希奭就殺之

唐書
本傳

郭曖華州鄭縣人子儀第六子年十餘歲尚代宗第四女昇平公主
昇平年亦與曖相類大曆中恩寵冠於戚里曖檢校左散騎常侍
朱泚亂爲賊所逼欲授僞官曖辭以居喪被疾旣而與公主皆奔

奉天德宗喜從駕至山南改太常卿同正員貞元中皇孫廣陵郡

王納曖女爲妃曖卒贈尚書左僕射妃生穆宗皇帝穆宗卽位詔

贈曖太傅子釗鉷鉅

舊唐書郭子儀傳

代宗獨孤妃薨贈貞懿皇后將葬

汾陽王在邠州以子尚主之故欲致祭遍問諸從事皆云古無人

臣祭皇后之儀汾陽曰此事湏柳侍御裁之時侍御掌汾陽書記

奉使在京師以書急召之既至說祭事初亦對如諸人既而曰禮

緣人情令公勲德不同常人且國姻戚自令公始亦謂得宜汾陽

曰正合子儀本意侍御草祭文首稱駙馬都尉郭曖父中叙特恩

許致祭之意辭簡禮備汾陽覽之大喜

因話錄

釗代宗朝以外孫爲

奉禮郎累官至左金吾大將軍改邠寧節度使入爲司農卿憲宗

寢疾宦豎妄議廢立穆宗問計於釗答曰殿下爲太子當旦夕視

膳何外慮乎時稱得元舅體穆宗卽位爲河陽三城節度使徙河

中尹領晉絳慈隰節度敬宗立又帥劍南東川太和中南蠻寇蜀
杜元穎不能禦詔劍兼領西川節度劍貽書蠻首差巔曰元穎數
侵吾圍我以是報乃與劍脩好約無犯天子嘉之卽拜西川節度
使以疾請代爲太常卿卒贈司徒鑑字利用尚德陽郡主詔爲主
營第長興里順宗立主進封漢陽公主擢鑑檢校國子祭酒駙馬
都尉自景龍後外戚多爲檢校官不治事宰相薦其才不當以外
戚廢乃拜右金吾將軍封太原郡公恭遜折節不以富貴加人性
周畏有諫於上退必毀稿家人子弟無知者別墅在都南尤勝塏
穆宗嘗幸之置酒極歡改太子詹事充閑廐宮苑使卒贈尚書左
僕射唐書郭子儀傳昇平公主生子三人女二人長爲皇太后今上卽位
皇太后昆弟皆寵錫尊官君最少自汾州刺史入爲殿中監尚西
河公主歲餘改宮苑閑廐使長慶三年暴疾卒太后聞之驚悼悲

一哀使者自中宮出按問發疾之狀月餘乃解

沈亞之撰郭銛墓誌

釗子仲文

仲恭仲詞開成二年詔仲文襲太原郡公給事中盧弘宣奏釗妻

沈公主女代宗皇帝外孫其子仲詞尚饒陽公主使仲文承嫡則

沈當黜且仲詞亦不得尚主乃詔仲詞襲封仲文以太皇太后故

置不問仲恭歷詹事府丞亦尚金堂公主

唐書郭子儀傳

杜棕京兆萬年人佑子式方之第三子也以蔭三遷太子司議郎元

和九年選尚岐陽公主岐陽憲宗長女郭妃所生自頃選尚多於

貴戚或武臣節將之家於時上頗重學士遂令宰臣選尚文雅之

士可居清列者初於文學後進中選擇皆辭疾不應惟棕願焉累

授忠武軍節度使開成初入爲工部尚書判度支屬岐陽公主薨

久而未謝文宗怪之戶部侍郎李班對曰近日駙馬爲公主服斬

衰三年士族之家不願爲國戚者半爲此也乃詔行杖周永爲通

制會昌中拜中書侍郎同中書門下平章事大中初出鎮西川俄復入相加司徒太傅邠國公

舊唐書杜佑傳

惛通貴日久門下有術士李

某惛待之厚惛任西川節度使馬植罷黔中赴闕至西川術士一見密於惛曰相公將有禍非馬中丞不能救惛驚信發日厚幣贈之仍令吏爲植於都下買宅生計無闕植感惛不知其旨俄而作相懿安皇太后崩惛懿安子壻也忽一日內榜子檢責宰相元載故事植喻旨翼日上前萬端營救植素辨博能回上意事遂寢又杜何博士惛之子也仕蜀無他才止以貴公子享俸祿恥其官卑詣執政陳啓自述門閥執政愍而慰之

東觀奏記

韋保衡字蘊用京兆人父慤字端士太和初登第大中四年拜禮部侍郎選士頗得人領節度使卒保衡咸通五年登進士第累拜起居郎十年正月尚懿宗女同昌公主公主郭淑妃所生妃有寵出

降之日傾宮中珍玩以爲贈送尋以保衡爲翰林學士拜中書舍人兵部侍郎不期年以本官平章事保衡恃恩權素所不悅者必加排斥自起居郎至宰相二年之間階至特進扶風縣開國侯食邑二千戶十一年八月公主薨恩禮漸薄咸通末淮徐盜起竟得罪賜死

舊唐書本傳

宋

王繼勲彰德節度饒之子孝明皇后同母弟也性凶率無賴以后故爲內殿供奉官領虎捷左右廂都虞候權侍衛步軍司事所爲多不法會新募兵千餘將遣出征繼勲縱令掠人子女京城紛擾上聞遣捕斬百餘人人情始定時后已崩上追念后故不之罪也乾德四年復爲部曲所訟詔解兵柄奉朝請繼勲怏怏專以鬻割奴婢爲樂一日天雨墻壞群婢突出訴冤上命中使詰之盡得繼勲

所爲不法事詔削奪官爵勒歸私第開寶三年命分司西京繼勲
殘暴愈甚強市民間子女備給使小不如意卽殺食之而棺其骨
棄野外洛民苦之不敢告太宗在藩邸頗聞其事及卽位乃斬繼
勲洛陽市其後家寓西洛潁陽孫惟德不能自立丐食以給眞宗
聞而憫之授汝州司士參軍

宋史外
戚傳

王誨字晉卿全斌之後家京兆能詩善畫尚蜀國長公主官至留後

宋史王

全斌傳

宦官

宦官出入宮闈供掃除之役延及漢唐或至手握大權口含
天憲則任用者之失也各史多不詳其邑里茲掇其秦產者

附於帝
系之末

景監闖人也

史記正義

公孫鞅西入秦因寵臣景監求見孝公孝公旣見

衛鞅語事良久罷而怒景監曰子之客妄人耳安足用耶景監以

讓衛鞅鞅曰吾說公以帝道其志不開悟矣後五日復求見鞅未中旨罷而孝公復讓景監景監亦讓鞅鞅曰吾說公以王道而未入也請復見鞅鞅復見孝公孝公善之而未用也罷而去孝公謂景監曰汝客善可與語矣鞅曰吾說公以霸道其意欲用之矣誠復見我我知之矣衛鞅復見孝公公與語數日不厭景監曰子何以中吾君吾君之驩甚也鞅曰吾以強國之術說君君大說之耳

商君傳



孫小字茂翹咸陽石安人父瓚爲赫連屈丐所殺小没入宮刑會魏平統萬遂徙平城内侍東宮以聰識有智畧稱未幾轉西臺中散每從征伐屢有戰功多獲賞賜世祖幸瓜步慮有北寇乃除留臺將軍車駕還都遷給事中領駕部課理有方畜牧蕃息出爲并州

刺史州內四郡百餘人詣闕頌其政化後遷冀州刺史所在清約
當時牧伯無能及也

魏書聞官傳

王遇字慶時本名他惡馮翊李潤鎮羌也自晉世已來恒爲渠長父
守貴爲郡功曹卒遇坐事腐刑爲中散遷內行令中曹給事中遷
散騎常侍安西將軍出爲華州刺史幽后之前廢也遇頗言其過
及後進幸高祖遣御史馳驛免遇官世宗初兼將作大匠未幾拜
光祿大夫復奪爵廢后馮氏之爲尼也公私罕相供恤遇往來祇
謁不替舊敬每有薦奉后皆受而不讓遇性巧強於部分北都方
山靈泉道俗居宇及文明太后陵廟洛京東郊馬射壇殿文昭太
后墓園太極殿及東西兩堂內外諸門制度皆遇監作雖年在耆
老朝夕不倦與少壯者均其勞逸又長於人事競於營利卒于官
遇爲文明太后所寵前後賜奴婢數百人他物稱是號富室

魏書聞官

傳

陳忠盛字懷泰潁川許昌人今家於長安祖守節父文叔俱內常侍忠盛先天歲解褐補內侍省掖庭局監尋轉內僕丞內僕令秩滿遷內侍伯內謁者監加朝散大夫以天寶十三年薨于私第子仙

甫拜內謁者監

裴士淹撰內侍陳忠盛碑

韋某京兆人父楚皇任內給事中武德使判宮闈令事某髫年參內侍省出入門閤情志專良開元十年解褐授內府局丞尋充市舶使每宣諭諸道敷揚詔旨人皆說服天寶初拜朝議郎判宮闈令知本局事五年加朝散大夫內謁者監以才藝敏悟時望歸美尋加朝議大夫拜內給事中乾元元年終於私第嗣子守內侍省上柱國賜紫金魚袋守宗次內侍省內侍伯守堅次內侍省宮教博士

士守幹于肅換內給事韋某碑

袁思藝華州人特承恩顧然力士巧密人悅之思藝驕倨人疎之十

四載置內侍省內侍監兩員秩正三品以力士思藝對任之元宗

幸蜀思藝走投祿山舊唐書
宦官傳

孫常楷京兆涇陽人釋褐內侍伯遷文林郎內謁者監賜緋魚袋轉

朝議郎內給事上柱國特加朝散大夫擢授內常侍貞元五年卒

常楷性慈惠尤深象教歸全之日恍如先知召群子受理命奄然

而終猶子朝議大夫內侍省內給事上柱國充慶州監軍榮義于郃

換內常侍貞元十五年孫榮義為右軍中尉怙寵驕恣貪利冒寵

之徒多附麗之舊唐書
宦官傳榮義歷右武衛大將軍贈揚州大都督唐書

宦者
傳

程元振京兆三原人少以宦人直內侍省遷內射生使飛龍廐副使

張皇后謀立越王元振發其姦立太子是爲代宗拜右監門衛將軍知內侍省事再遷驃騎大將軍邠國公盡總禁兵不踰歲權震天下在輔國右凶決過之裴冕與元振忤貶施州來瑱守襄漢有功元振嘗諉屬不應因誣殺瑒同華節度使李懷讓被構憂甚自殺素惡李光弼數媒蜮以疑之廣德初吐蕃党項內侵帝出居陝京師陷於是太常博士柳伋上疏言陛下欲存宗廟社稷獨斬元振首馳告天下帝顧公議不與乃下詔盡削元振官爵放歸田里帝還元振自三原私入京師舍司農卿陳景詮家圖不軌御史劾按長流溱州行至江陵死時又有駱奉先者亦三原人歷右驍衛大將軍數從帝討伐尤見倖廣德初監僕固懷恩軍恃恩貪甚懷恩不平旣而懼其譖遂叛事平擢奉先軍容使永泰初以吐蕃數驚京師始城鄆以奉先爲使累封江國公監鳳翔軍大曆末卒

宦者傳

焦希望涇陽人歷明威將軍贈洪州都督

唐書宦者傳

貞元十二年六月

特立護軍中尉中護軍以帥禁軍以內謁者監焦希望為左神策

中護軍

舊唐書宦官傳

希望寓籍於京兆府之涇陽弱冠選侍彤闈守內

府局同正丞授承務郎帝在春宮每加信任洎正宸極除給事同

正賜金印紫綬益見親重命監射生軍事貞元五年詔以射生軍

為神威軍加內常侍同正兼謁者監十三年制加中護軍累遷內

侍省內侍同正兼內常侍

吳通微撰內侍焦希望碑○按舊唐書設中護軍年分與碑文不合

彭獻忠字琦夫京兆三原人父令俊行內侍省內謁者監獻忠以建

中三年入侍德宗嘉其敏厚器任異等貞元三年授內府局丞四

年授內謁者監十一年授朝請大夫十六年特加金紫二十年加

內侍省內侍仍賜上柱國充教坊使元和元年封襄武縣開國男

充飛龍使二年加右武衛將軍三年授左神策軍副使加雲麾將軍其年奉詔充淄青道宣慰使六年遷知內侍省事充弓箭庫使十月遷左領軍大將軍充左神策軍護軍中郎將十二年春以勤瘁邁疾薨

張仲素撰中尉彭獻忠碑

曹知慤耀州人僖宗時宦者黃巢陷長安知慤歸里中傾家募壯士以拒巢嘗數遣壯士入長安乘夜撓巢軍巢軍數夜驚疑其下有叛者忽忽無固志諸軍乘此遂平長安會知慤私議諸扈從者無功欲待其入關分別去留以示賞罰諸扈從者聞之大懼乃共爲蜚語言知慤且爲變會田令孜忌其功遂矯旨令王行瑜襲擊殺

之耀州志

五代

張居翰字德卿故唐掖庭令張從玫養子昭宗時爲范陽軍監軍與

節度使劉仁恭相善天復中大誅宦者仁恭匿之以免後梁兵攻仁恭仁恭遣居翰從晉王攻梁潞州以牽其兵晉取潞州以居翰爲昭義監軍莊宗卽位與郭崇韜並爲樞密使崇韜專政居翰默然而已魏王破蜀王衍朝京師行至秦川而明宗軍變莊宗東征慮衍有變遣人馳詔魏王殺之詔書已印畫居翰發視之詔書言誅衍一行居翰謂殺降不祥乃以詔傳柱指去行字改爲一家時蜀降人與衍俱東者千餘人皆獲免莊宗遇弒居翰見明宗求歸田里天成三年卒於長安

五代史宦官傳。按居翰邑里未詳但傳末旣云歸田又云卒於長安則秦人

可知矣

成敬字思恭耀州人永樂甲辰進士選庶吉士改晉府奉祠宣德時以晉府事府官悉論死敬議長流敬自以遺累子孫乞就死宣廟

憐之下腐刑不死景帝在邸邸以典寶侍講讀既卽位入內府爲
太監親信任事不招權不乞恩上嘗欲官其親屬數問其親屬在
京者幾人敬對親屬俱在籍且田夫不可以官未幾又問又對如
初上益多其讓及卒遣官護喪修墳給葬祭一時以爲殊遇

權州志

李本朝邑人正統間爲御用監太監賚蟒玉歷四朝年八十乞身遣
中使送歸私第卒賜諭祭

同州志

張福朝邑人正統間以內侍歷掌司設監雅被寵遇

同州志

王新朝邑人弘治間給事御馬監適駕前馬逸人莫敢撓新馳控就
列上壯之陞少監賜蟒玉後與壽寧侯張鶴齡廷爭事拳毆壽寧

謫南京火者

同州志

麻俊三水人內官監太監弘治五年命修造米鹽油蠟等庫三水分

縣建治皆其力也

邠州志

劉瑾興平人故姓淡純帝時領教坊見幸敬帝初擯茂陵司香其後得侍東宮爲太子所悅太子卽位爲毅帝時瑾掌鐘鼓司朝夕與其黨八人者爲狗馬鷹犬歌舞角觝以娛帝帝狎焉劉健謝遷李東陽連疏請誅之皆留中戶部尚書韓文等繼之司禮太監王岳范亨徐智等從中應之帝勉許之八人夜繞帝前泣搶地瑾進曰今左班官敢譁無忌者由司禮監無人也有則惟陛下耳帝於是立遷瑾爲司禮監瑾夜傳命榜笞岳亨智逐之南尋矯詔殺於途於是內揣帝意外日以深文誅求諸臣使莫敢進言帝喜謂瑾可任悉委之瑾選官校百餘四出察事作大枷枷及三品以下官員坐事罰米動百千石委科道官查盤遠歲錢穀雖浥損者悉鉤索令償又倍之科道還報以叅劾多而賄賂重者爲稱職不則繫撻隨至其內外章奏無大小先白瑾乃敢奏奏至不復干涉內閣持

歸私第撰僞旨付外益用其親故布列要地變易吏兵二部選法任情陞罷又以事籍沒故大臣家收謫其妻孥日夜簡括天下庫藏增益諸邊屯田賦稅以肥私家海內騷然以有宣鐸之變而卒及於禍先是宣鐸之變詔太監張永與故都御史楊一清討之未至而宣鐸已擒八月永至自寧夏獻俘賜宴比夜鐸先退永出疏密白反狀上悟執瑾明日降奉御閒住之鳳陽瑾常引四方術士出入其家妄稱其姪劉二漢者當大貴以是有反心太監孫和等私造衣甲弓弩遺瑾瑾受之竊竊有不軌圖初上尚未有意誅瑾及籍其家上大怒曰瑾果反乃以付獄獄上命無覆奏凌遲之并

二漢論斬

名山藏官雜記

張瑜陝西人弘治乙丑四月孝廟不豫大璫瑜與劉瑾同開主御藥得旨召醫以院判劉文泰御醫高廷和進兩人者素與交結謂上

疾易治效且獲賞竟以誤投到劇且晏駕舉朝痛憤奏下三人獄
皆論斬是秋已赴市而瑜黨于瑾瑾傳旨取還仍幽於獄爲法曹
論駁不得脫瑾怒逐閔少保張都憲楊大理免瑜等出獄

簪雲樓
雜說

門朝棟臨潼人幼事李盡忠神宗李妃之族黨也恃椒房之勢多所
凌侮魏監忠賢數爲所困熹宗嗣位忠賢竊柄大肆報復盡忠死
近侍匿弗出嗣得毛監者引進給事掖廷晉乾清宮近侍賜蟒玉
浸貴顯忠賢頗識之姑置不問朝棟喟然歎曰忘主仇而與共事
非仁者事也卽日謝病歸里潛居秦邸者二十年鼎革以來築圃
於戲水之西蒔菊花數十種兼植雜卉閉門自賞復修黃白之學

又二十餘年卒

願學
堂集

袁祿興平人官人數司房甲申變後痛心寇禍遂屏居于華旋祝髮
爲浮屠居蟠龍嶺寺後居州城之西郊人高其義謂所居爲袁公

庵華州志

葛景盤屋人司禮太監小心畏慎中外稱為長者盤屋志○按景世次無考

